



ZIMBABWE SCHOOL EXAMINATIONS COUNCIL
General Certificate of Education Ordinary Level

SHONA LANGUAGE

PAPER 1: Rondedzero neNzwisiso

4007/1

Nguva: Maawa maviri

SPECIMEN PAPER

Additional materials:
Answer booklet

RAYIRO KUVANYORI VEBVUNZO

Uchapiwa mapepa okunyorera mhinduro dzako.

Nyora zita rako, nhamba yenzvimbo yauri kunyorera nenhamba yako yawakapiwa somunyoripabepa roga roga remhinduro rawashandisa.

Pindura mubvunzo **mumwe** chete **muChikamu I** nemibvunzo yose **muChikamu II**.

ZIVISO KUVANYORI VEBVUNZO

Zvibodzwa zvakapiwa muzvikomberedzo izvi () pamagumo pechidimbu chemubvunzo, uye izvi [] panoperera mubvunzo woga woga.

Mibvunzo yose inofanira kupindurwa ne**ChiShona** chete.

Ukashandisa mapepa anodarika **rimwe**, asunganidze pamwe chete.

Bvunzo ino yakanyorerwa pamapeji mashanu.

Copyright: Zimbabwe School Examinations Council, Specimen Paper.

CHIKAMU A: RONDEDZERO [50]

Zvichakubatsira kuti upedze **awa imwe chete** pachikamu chino. Sarudza musoro **mumwe chete** pane yose yakapiwa. Chinyora rondedzero yemhando yawasarudza nemanzwi ari pakati **pemazana matatu (300) nemazana matatu ane makumi mashanu (350)**.

- 1 (a) Nyora nyaya inodudzira tsumo yokuti 'Kashiri kasingapambari hakanuni.' [50]
- (b) Kukosha kweBumbiro idzva reDzidzo muZimbabwe. [50]
- (c) Wakakokwa kuti utaure kuungano yeboka rebudiriro revechidiki. Chinyora mashoko auchataura kuboka iri uchipa mazano emabasa emaoko avangaite kuzviraramisa. [50]
- (d) Nyora mhan'aro kumukuru wemapurisa uchimutsanangurira mhosva dziri kuparwa mudunhu menyu nezvingaitwa kupedza mhosva idzi. [50]
- (e) Nyora tsamba kuna Sachigaro weMutambo weNhabvu uchiburitsa zvingaitwe kuvandudza mutambo uyu munyika yeZimbabwe. [50]
- (f) Nyora hurukuro pakati pevarume vaviri vari kukurukurirana pamusoro pekunaka nekuipa kwemikando iriko mazuva ano. [50]
- (g) Zvingaitwe kuderredza njodzi dzemumigwagwa. [50]

CHIKAMU B: NZWISISO NEPFUPISO [30]

- 2 Verenga ndima inotevera ugopindura mibvunzo iri pazasi neChiShona chakanaka.

VaNhengure zvavakanga vatamira kupurazi kuna Zivagwe vakaita chibatabishi kuvaka dzimba. Vakashanda nesimba pamwe nemhuri yavo. Pazororo vaibatsirwa navana vavo vechikoro. Nguva pfupi musha waVaNhengure wakanga wava musha unoyevedza.

Dhokota Nhengure akati aona baba vake vavaka musha wavo mutsva akavakisawo imba yake. Iyi imba yakatora nguva ichivakwa. Yakati yapera, imba iyoyo yakava chishamiso. Vanhu vange vasati vamboona imba yorudzi irworwo mumaruwa asi kutawindi chete.

Imba yadhokota Nhengure zvayakanga yapera akafunga zvokuti achichata nanesi Chijaka uyo akanga ava kuita somukadzi wake. Vharandaini akataurira baba vake nyaya yake ivo vakamuti aifanira kutanga kuronga zvokuroora ivo vachigadzira zvokubika doro rokuzopemberera purazi nokutaridza vanhu musha wavo mutsva.

Vharandaini asati aronga zvokunoroora Chijaka, VaNhengure vakabika doro ndokukoka hama dzavo navamwe vavakidzani vavo vavakanga vasiya kwaGutu. Hurudza yakabikira doro zvenharo kuita machuruchumbwi. Vakabaya n'ombe kuti vanhu vawane usavi.

Shasha dzedoro vanaMundawaro, Rabudahweta, VaNdari, vanamai Dirai, VaDzasukwa, VaRuviriro, VaChihwerure, navanaJereramuroromo navamwe vakakwira hambautare vakasvika papurazi paVaNhengure, vakagamuchirwa nomufaro mukuru. Chakanga choda kuti shatei ndiMberi aiva arere achirwara.

Dhokota Nhengure neshamwari yake nesi Chijaka vakauyawo nemota yavo yaipenya sedziva. Iri ndiro raiva zuva rokutanga raChijaka kusvika pamusha paVaNhengure. Mukoti uyu akati achiona bedzapedze reimba yaVharandaini akarohwa nehana yorufaro akamera zenze kumusana. Akafunga kuti zvino rugare ava kuzorudhinda, hana yake yakazara norufaro zvose namanyemwe kuti tucha. Ndinofunga kuti aifunga kuti, “VanaSipiwe navanaVhaireti navanaNyembezi makabata pasi. Soriyi henyu.”

Vanhu vachiona shamwari yaMazvikokota vakafunga kuti mukadzi wake waakaroora. Vamwe vaitotya kumumhorosa nokuti akanga akachenera zvenharo, akazvishongedza nokuzora twuzorwazorwa, wanei oita kunge ngirozi yabva kudenga. Vamwe ndivo vaiti kuna Mazvikokota, “Nhaisi, mwanangu, zvino zvamunozotora makaradhi akadai, zvino zvokusakura anozozvida here? Angabata sei badza iye akadaro?” Mazvikokota aivati, “Kusakura kweizve? Isu hatidakuri nokuti tine basa redu rokurapa vanhu.”

Vamwewo, vakanga vanzwa kuti haasati aroora, vakati, “Nhaisi vanangu, ko zvamunozongogara mose mukadzi asina kuperekwa hamuzivi kuti zvinoera? Isu taiziva kuti mukadzi anoorwa, ozoperekwa achiuya navatete vake, ombogara kumusana, zvino wozomupiwa. Iyi ndiyo tsika yakanaka nokuti vadzimu vemhuri mbiri vanenge vasumiwa nomazvo kuti vagokupaiwo makomborero avo. Zvino zvamava kuita imi vana tinoziva hazvichina tsika, zvava kunge mutakurabere asi chete munenge matenderana henyu pachenyu kuti mutakurane. Ndiyo tsika yedu here?” Mazvikokota akati kuna VaChihwerure naVaRuviri vaimutongesa, “Izvo, vanambuya ndozvamaiita kare zvinhu zvichaera. Mazuvano chava Chirungu, hapana zvichaera.” Vanambuya vava vakati, “Zvisingaeri nei? Zvinoera! Hauzivi kuti chisi hachieri musi wacharimwa? Iwe unenge unopenga kwazvo. Zvino iyeyo mukadzi wako wawakatora unoziva vabereki vake nomutupo wake namatongo avo? Bva woita zvokuchata kwazvo utipewo tii namazingwa makuru, nedoro reChirungu tinomwawo.”

“Tichachata hedu mugodyawo zvingwa nokumwa tii, nedoro reChirungu tinokutengerai,” akadaro Mazvikokota achibva aenda kwaiva kwaungana varume vachimwa doro vachifara zvavo.

(Nyaya yakanatsurudzwa kubva mubhuku **Museve Wade Nyama** rakanyorwa naI.M. Zvarevashe. Mambo Press, 1995.)

- (a) VaNhengure vakavakira musha wavo kupi? (1)
- (b) Ndiani aibatsira VaNhengure kuvaka panguva yezororo? (1)
- (c) Buritsa ukama hwaiva pakati paVharandaini naVaNhengure. (1)
- (d) Ipa chikonzero chinopiwa naDhokota chinoita kuti Chijaka asaite zvekusakura. (1)
- (e) Nyurura izwi riri mundima rinoreva zvakafanana netsanangudzo dzapiwa.
 - (i) kuita chinhu uchikurumidza (1)
 - (ii) zvinhu zvakawandisa (1)
- (f) Ipa chikonzero chaigona kukanganisa mutambo wakarongwa naVaNhengure. (2)

- (g) Nyurura ndevo iri mundima inoratidza kuti Chijaka aitarisira kuti aizova neupenyu hwakanaka kana aroorwa naVharandaini. (2)
- (h) Ndedzipi tsika mbiri dzekuroorana dziri kuburitswa mundima? (2)
- (i) Zvii zvanzi hazvichaeri mundima umu? (2)
- (j) Tsanangura zvinoreva ndevo dzinotevera sekushandiswa kwadzakaitwa mundima.
- (i) Hurudza yakabika doro zvenharo. (2)
- (ii) Akamera zenze kumusana. (2)
- (iii) Chisi hachieri musi wacharimwa. (2)
- (k) Nyora pfupiso yenyaya iyi nemanzwi ako asingapfuuri makumi mashanu. (10)
- [30]

CHIKAMU C: MASHANDISIRWO EMUTAURO [20]

Pindura mubvunzo yose uchikamu chino.

3 Zadzisa tsumo dzinotevera. Sarudza **shanu** chete.

- (a) Mvura bvongodzeki _____. (1)
- (b) Chiri pamuchena _____. (1)
- (c) Chitsva _____. (1)
- (d) _____ ndicho chakachenjedza. (1)
- (e) _____ kubata mhani anorwirana. (1)
- (f) Kufa kwehanga _____. (1)
- (g) _____ inoparira parere nhema. (1)

4 Shandisa nyaudzosingwi dzinotevera muzvirevo. Sarudza **shanu** chete.

Semuenzaniso: Nyaudzosingwi: pfacha
Chirevo: Vachakamira, akabva ati pfacha kusvika.

- (a) tumbi (1)
- (b) dzvi (1)
- (c) nyonde (1)

- (d) rukutu (1)
- (e) hwe-e (1)
- (f) ware (1)
- (g) tasa (1)

5 Umba madimikira uchishandisa nhengo dzemiviri dzinotevera.
Sarudza **shanu** chete.

- (a) nzeve (1)
- (b) mhino (1)
- (c) ruoko (1)
- (d) gotsi (1)
- (e) tsoka (1)
- (f) chirebvu (1)
- (g) mbabvu (1)

6 Ipa zvinhu zviviri zvakasiyana zvinorehwa namanzwi akapihwa pazasi.
Sarudza **mashanu** chete.

Sokuti: dura - imba inochengeterwa zvirimwa zvakohwewa
 - taura uchibudisa zvakavanzika

- (a) guru (1)
- (b) nzara (1)
- (c) doro (1)
- (d) gomba (1)
- (e) gore (1)
- (f) rima (1)
- (g) kamba (1)

[20]